



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

29 Maiu 2015

Timor-Leste komemora loron mundiál ba labarik ho tema nasionál: “Hatete lae ba violénsia no diskriminasaun ba labarik”

Iha 01 Juñu kada tinan, mundu tomak komemora loron ida ne'e hanesan loron mundiál ba labarik sira inklui Timor-Leste. Iha komemorasaun ba tinan ida ne'e nian, ita komemora ho tema “hatete lae ba violénsia no diskriminasaun ba labarik”

Komemorasaun ba loron importante ne'e, atu refleto esforsu sira ne'ebé ita halo ona, no saída mak prezisa atu halo hodi próteze labarik enjerál no liu-liu labarik feto sira hosi kualker forma violénsia hasoru sira. Komemorasaun ne'e, nu'udar komitmentu no obrigasaun ne'ebé hatuur iha Konstituisaun no konvensaun internasionál sira ne'ebé Estadu ratifika ona.

“JSMP observa katak labarik feto barak mak sai vítima ba kualker forma violénsia inklui krime inestu ne'ebé involve membru familia rasik hanesan aman, tiun ka sira nia avo rasik. Tema nasionál ba komemorasaun iha tinan ida ne'e refleto duni realidade aktual labarik sira iha Timor-Leste. Tanba labarik barak mak sei moris iha violénsia no diskriminasaun nia laran,” dehan Luis de Oliveira Sampaio, Diretór Ezekutivu JSMP.

JSMP rejista katak labarik feto barak mak sofre violénsia seksuál no abuzu seksuál hosi sira nia membru família rasik no lakon sira nia futuru tanba violénsia no trauma ne'ebe sira hetan.

JSMP deskobre realidade hirak ne'e husi atividade monitorizaun regular iha tribunál haat hahu husi Juñu 2014 to'o Maiu 2015 iha juridisaun hotu iha Timor-Leste, ne'ebé hatudu katak kazu violénsia doméstika no abuzu seksuál hamutuk atus ida resin mak akontese hasoru labarik sira (la inklui kazu ne'ebé JSMP la monitoriza).

JSMP hein katak liu husi komemorasaun loron mundiál ba labarik, fó biban ba komponente sosiedade Timor-Leste tomak hanoin no refleto saida mak prezisa hametin di'ak liu tan iha futuru hodi hadok labarik sira husi forma violénsia hotu-hotu.

Rua setubal, Colmera, Dili Timor Leste

PoBox: 275

Telefone: 3323883 |77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

JSMP mós ezije ba orgaun estadu sira, liu-liu governu atu hari'í sistema no dezenvolve polítika ida ne'ebé responsivu hodi garante protesauun adekuada ba labarik sira nia direitu, tanba tuir Konstitusaun RDTL labarik sira iha direitu ba protesauun espesial hasoru hahalok hotu hanesan la tau matan, diskriminasaun, violénsia, abuzu seksuál no explorasaun.

Relasiona ho komemorasaun lora importante ne'e, JSMP hakarak hato'o parabens ba labarik iha mundu tomak, liu-liu labarik sira iha Timor-Leste.

Atu hatene informasaun detallu kona-ba violénsia ne'ebé mak labarik sira hasoru, bele haree iha JSMP nia relatóriu tematiku ne'ebé lansa ona iha fulan Juñu 2014 ho titlu "Labarik sira-nia asesu ba justisa formál iha Timor Leste iha www.jsmp.tl.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org